



## *Ke Kula ‘O Nāwahītokalani‘ōpu‘u*

*“No ‘Ane‘i Ko Kākou Ola”*

### **KULEKELE HO‘OKĀINOA**

(‘Āpono ‘ia e ka Papa Alaka‘i 12-IV-2018)

#### **No Ke Kumu Ho‘opa‘a**

‘A‘ole e ho‘okae ‘ia e Ke Kula ‘O Nāwahītokalani‘ōpu‘u kekahi haumāna no kona lāhui, ‘āina kupuna, keka, kīnānā, ‘ike ‘ōlelo Pelekānia ‘ole, ho‘omana a kumu ‘ē a‘e i pāpā ‘ia ma ke kānāwai. ‘O ke kumu o kēia kulekele, ‘o ia ka ho‘opa‘a ‘ana i mau a‘oa‘o a ‘ōkuhi no ka ho‘okāinoa haumāna e kū ana i nā kānāwai moku‘āina a pekelala no ka ho‘ona‘auao kaia‘ōlelo Hawai‘i ma Nāwahītokalani‘ōpu‘u.

#### **No Ka Laulā O Ka Pili**

Wehewehe ‘ia ke ki‘ina hana no ka ho‘okāinoa ‘ana i nā mea noi komo mai loko mai o nā māhele ‘ehā.

- Mea ‘ōlelo Hawai‘i i hō‘oia ‘ia e noi komo ana no ka Mālaa‘o
- Hoahānau pono‘ī o nā mea noi komo mālaa‘o (e noi komo ana ma kekahi papa ‘ē a‘e)
- Mea noi komo no ke kaiāulu
- Mea noi ho‘ololi kahua kula (mea noi komo no nā papa 1 a i ka 8 mai loko o kekahi kula kaia‘ōlelo/ho‘olu‘u ‘ōlelo Hawai‘i)

#### **No Nā Noi Komo**

- No Nā Mea ‘ōlelo Hawai‘i I Hō‘oia ‘ia E Noi Komo Ana No Ka Mālaa‘o
  - Palapala Ho‘okāinoa e loa‘a ana mai Dekemapa mai
  - E hiki ke ‘ae ‘ia ke kāinoa ‘ana ma Dekemapa o nā keiki hele kula kamali‘i kaia‘ōlelo Hawai‘i a mea ‘ē a‘e i hō‘oia kūhelu aupuni mua ‘ia ka ‘ōlelo Hawai‘i ‘ana e piha ana ka 5 MH ma ke 31-VII
  - Ho‘opa‘a ‘ia he hālāwai pili kāinoa no ka haumāna a me ka ‘ohana no Ianuali
- No Ka Hoahānau Pono‘ī O Nā Mea Noi Komo Mālaa‘o
  - Palapala Ho‘okāinoa e loa‘a ana mai Dekemapa mai
  - E hiki ke ‘ae ‘ia ke kāinoa ‘ana ma Dekemapa o nā keiki e piha ana ka 5 MH ma ke 31-VII
  - Ho‘opa‘a ‘ia he hālāwai pili kāinoa no ka haumāna a me ka ‘ohana no Ianuali

- 
- Mea Noi Komo Mālaa‘o No Ke Kaiāulu A Me Nā Mea Noi Ho‘ololi Kahua Kula
  - Palapala ho‘okāinoa e loa‘a ana mai Pepeluali mai
  - Ho‘opa‘a ‘ia he hālāwai pili kāinoa no ka haumāna a me ka ‘ohana no Malaki
  - E hiki ke ‘ae ‘ia ke kāinoa mālaa‘o ‘ana ma Dekemapa o nā keiki e piha ana ka 5 MH ma ke 31-VII
- Inā ua ‘oi aku ka heluna haumāna o kekahi papa ma ‘ō aku o ka palena o ka piha, e mālama ‘ia ka ‘ikepili o ka haumāna noi komo ma ka papa kūkali
- Inā hō‘ole ka haumāna i ‘āpono ‘ia e kāinoa ‘a‘ole e kāinoa ‘o ia, e lilo kona wahi i ia haumāna aku e kū ana i ka ho‘okāinoa ‘ia a e pono ia haumāna mua e noi komo hou ke mana‘o hou e ‘imi kāinoa.
- ‘O ka po‘e noi komo ma hope o ka wā ho‘okāinoa ma Pepeluali, e mālama ‘ia nā inoa ma ka papa kūkali. Ke ka‘awale he noho haumāna, e ho‘opa‘a ‘ia he hālāwai pili kāinoa e like me ka wikiwiki i hiki i nā ‘ao‘ao komo hālāwai.

### **Nā Māhele Makakoho No Ke Kāinoa**

Ho‘onoho ‘ia nā mea noi komo ma nā māhele makakoho no ke kāinoa penei:

#### **Mālaa‘o-Papa 8:**

1. Nā keiki nāna e ‘ōlelo Hawai‘i ana ma ke ‘ano ‘o ia kā lākou ‘ōlelo mua me ka ikaika loa o ka ho‘ohana ‘ana, ‘o ia ho‘i, nā keiki mānaleo Hawai‘i hemahema o nā ‘ōlelo ‘ē
2. Nā keiki no loko mai o ka honua e noho mana ana ka ‘ōlelo Hawai‘i ma mua o nā ‘ōlelo ‘ē a‘e
3. Nā hoahānau pono‘ī o nā haumāna e noho hele kula nei ma Nāwahī
4. Nā keiki no loko o nā ‘ohana o ka po‘e ‘ōlelo walewaha i ka ‘ōlelo Hawai‘i
5. Nā keiki e kū ana i nā kānāwai moku‘āina a pekelala no ka ho‘ona‘auao kaia‘ōlelo Hawai‘i e like me ke koho a ke kula